

QUÆSTIO MEDICA,
CARDINALITIIS DISPUTATIONIBUS
MANE DISCUTIENDA
IN SCHOLIS MEDICORUM.

Die Jovis decimâ Martii 1718.

M. CLAUDIO VERGNE, Doctore Medico,
Præfide.

An salubris à labore sudor?

I.

QUI vivit, laborat; vita est indefessus labor. Labor quidem organicus, & mechanicus. Hujus laboris actor, institorque operis, solidum; opus, tritura; fructus operis, liquidorum tritus, pulsus, pressus, extenuatio. Icta solidis liquida nonnihil reflectunt. Par fluidorum est, liquidorum impulsui, resistentia. In hoc situm est constans & amicabile solida inter & liquida æquilibrium; summa omnium concordia. Magnis igitur laboribus fundata vita est, stabilita in solido; hic fons, hoc principium est movendi; id motu cietur interiore & suo: liquida verò impulsu agitantur externo. Quas liquida obeunt mutationes, colores induunt, sapores, varia tritura unius effecta sunt; & verò dissimiles colores & sapores sæpe tritus induit rebus, & exiit. Infinitos machinæ animalis labores, & naturæ robur efficax ac vegetum demirare. Nihil est in ortu, nisi punctum saliens, turgescens atomus & erumpens, palpitans subsultansque vesicula. Principio una aut altera sanguinis guttula arctissimam inchoat circuitionem: Mollia solidorum delineamenta, mucilaginosa, depressa, sibi invicem confidentia & confusa, systaltico vesiculæ motu, micare ac intremiscere occipiunt. Sese invicem quantiando, feriendo, impellendo firmitatem contrahunt & soliditatem, tonum ac tensionem adipiscuntur, quâ vasorum parietes hiare possint, & à sedimento præservari. Tilm hujus machinulæ sanguis, materni cruoris accessu, factus uberior, unde quaque premitur, obvia cogitur subire vasa, quorum vi systalticâ trudiur iterum, compellitur, usquequò alia occurrant vasa, quibus tandem eò deducatur, unde propulsus est. Non igitur nisi iteratis ictibus, laboribus assiduus, rudis adhuc dum corporis humani machina, circui-

A

tionis sanguinis, quod & vitæ est, filum orditur, ac perficit. Circuitionis tamen labor in fœtu, eò facilior est & expeditior, quod in eo cor unius ferè ventriculi usu gaudeat. Vitam agit fœtus in utero propriam. Quantumvis tritum elaboratumve nutrimentum ad fœtum devehatur; crassius tamen est ac nimis concretum, quàm ut concidi, attenuari, elaborari amplius non indigeat. Prælis ac tudiculis gracilioribus quidem, ac mollioribus, sed elasteris actiùs comprimentis, ac vibrantis fortiùs, quàm quæ sunt matris, fœtus utitur. Quò autem subtilius atteruntur succi, eò faciliùs tenellis partibus adhærescunt. Sic prementis potentiæ vi, & incrustationibus assiduis, partium omnium firma fit consociatio, indurantur ossa, expanduntur membræ & obfirmantur, turgescunt muscoli, robustiores fiunt, easque fortui vires impertiuntur, ut in fastidiosa uteri claustra sævire tandem occipiat. Laborem partûs fœtus aggreditur, parentem sibi adjutricem adigit, quæ sæpe invita parturit, nec nisi pressa doloribus parit. Quò robustior est fœtus, eò potentiùs laborat, eò promptiùs vulvam aperit, eò felicior partus futurus est. At at quæ lux ipsi orta est, quot & quantos, quamque insuetos accersit labores. Excussis aquarum jugo & pondere, aëris levitati & inconstantia traditur. Aliud nempe intus & extrà temperandum venit æquilibrium. Plethora interim recens natus obrueretur, nisi novi fluidis occurrerent permeandi tramites, totidemque sanguinis receptacula, eorum, quæ abolenda sunt, loco succederent. Qui parcè ac timide pulmonem nonnullaque alia viscera perreptabat sanguis; hæc eadem per infinitos canaliculorum tubulos abundè penetrat, ultraque minatur omnia diluviare. Pro describendo uno circuitu generali & publico, multi sunt & privati fluidis rotundandi vortices. Quot igitur, quamque varios motûs, exerceri convenit in recens nato! Quàm multæ sunt partium & singulares, & communes Provinciæ! Quanta laborum varietas & continuatio! Quales exuperandæ resistentiæ! ut prioris determinationis & obsequii sanguis haud immemor, novi & inassueti jugi docilis adeò sit futurus. Neque hîc meta laborum est. Quo ætate magis puer crescit ac viribus, eò solidiori cibo vivere assuescat necesse est. Nova non fit laboris forma, duriora etiam alimenta, unius tritura operâ, in tenuissimum pollinem, ac in cremorem abeunt. Non hujus laboris instrumentorum curta suppellex. Dentes molæ potentiam exæquant. Manûs habilitatem lingua imitatur & œsophagus, qui contritos & commolitos dentibus cibos colligit, & conglobatos vi suâ comprimit, transmittitque ad ventriculum. Magnum Torcularium est stomachus, seu prælum publicum quo in ore tusa alimenta, amplius, sed simul & semel deteruntur. In hujus partem veniunt diaphragma, hepar, lien, pancreas, muscoli abdominis, atque coli pars arcuata, quæ veluti pistilla totidem suprà, infrà, ante, retrò à lateribus ventriculum comprimunt fortiùs aut diverberant, vimque hujus tritoriam, quam quidem non faciunt, plurimum tamen amplificant. Quævis insuper alia corporis pars comminutioni chyli aut lævigationi non segniter allaborat. Manifesti sunt cordis & arteriarum impulsus; indubitatae cujusque valvulæ tum lymphaticorum, tum venarum compressiones; evidentia omnium & singularum fibrarum molimina tonica. Quin & ipse aër vehemens pistillum est, & ob pondus & ob elaterem, comminuendo chylo accommodatissimus; chylus enim ab intestinorum exitu, quavis in parte tenuatur, usque dum transpirando expiraverit. Hoc est unum æconomix

animalis negotium : hic unus in eo labyrintho labor intus. Quàvis ratione fiat, vita est ; æquabilis laboris norma, sanitas ; inordinata, morbus : omnimoda cessatio, mors.

II.

HOMO suarum rerum dominus, circuitum sui sanguinis, vibrationes, impetus, lutationes liquida impellentis potentia arbitrio suo non regit. Sanguis enim etsi malleis & incudi subditus, non tumultuosè obsequitur, non sediosè ; ut placida sunt, quibus urgetur, verbera ; sic nullos plagarum reddit crepitus. Conscijs utique homo sibi est, à se procul esse omnem hunc laborem. Vilibus, insectorum generi animalibus natura reservavit, ut cordis sui motus dominatu suo tenerent ; duplicem respirationis actionem, transpirationem, aliasque secretiones pro nutu suo amplificarent, extenuarent, compescerent : nonnulla etiam ita vitæ imperant, ut vitâ functa, redeant in vitam. Quando quidem culpâ suâ homo spoliatus est omnibus hisce, vitæ pro libitu tuendæ commodis, queis fortè jam, pro degeneri naturæ statu, ne omni scelere suo ac perfidiâ abuteretur, utilius ipsi est carere quàm frui. Decretum est, ut labor fieret homini necessarium vitæ subsidium, & opera ipsi vita esset. Quæ in consideratione, contemplatione, affectu, cultu divini Numinis, deliciisque animi & corporis vita versata esset ; totam hanc in laboribus & afflictionibus corporis, animique curis & motibus transigere homo iussus est. Tantum potuit invehere malorum, vitæque humanæ conditionem depravare, legis divinæ, sanctæque Religionis contemptio. Inde laboris necessitas orta est, inde homo nascitur ad laborem, vitamque primùm labore sustentat, postea alimento. Cumque victus cultusque humanus, non uti feris, in propatulo, ac sylvestribus locis ; sed domi, sub tecto accurandus esset, multa alia, præter victum cultumque tenuem, homini accesserunt operum incitamenta & laborum. Concinnæ vestes & numerosæ, domus quæ dominum honestet suum, elegans ac bene ordinata supellex, mensa exquisitis epulis instructa, famulitium, equitium & similia, quorum ratio si hereditate non venerit, quantis & quàm iniquis sæpe laboribus comparentur, quibus ea cordi sunt, viderint. Hæc tamen vitæ impedimenta noli spernere, nec putare parvi, si vis esse aliquid, & dicier hic est. Sunt etiam homini animi motus, sensus & impetus, quibus vincendis magno labore opus est, explendis autem maximo. Nequissima paupertas in ore impii, sola laboribus damnata esse dicitur ; at quàm multis & magnis etiam mulctantur durissima divitiarum conquisitio, miserrima ambitio, honorumque contentio. Pauperes quidem laborem corporis, pondus diei, ac solis ardorem sustinent ; at ipsis induciæ sunt quietis, feriæ intercedunt, intercalatæ pœnæ somni & securitatis usuram habent. Sordidorum verò divitum labor, quem vocari malunt negotium, nullam solido de die partem demit, perambulans in tenebris, somnos prohibet quietos ; curâ, sollicitudine, metu distracti, quidquid omnibus abstulère, sibi ipsi negant. Adeò verum est plus laborum impendi, ut sordidus ac nocens vivas, quàm ut integer vitæ, scelerisque purus, sive per syrtes, iter, æstuosas, sive, facturus per inhospitalem caucasum, &c. Quamlibet eligas sortem, omnibus officii muneribus proposita est vita nostra, nec est recusandus labor. Nec verum est quod dicitur à quibusdam, propter necessitatem vitæ, idcirco solùm esse homini laborandum, integris verò & fortunatis dari omnem omnino laborum im-

munitatem. Dissoluta vanitas ! insidiosissimæ blanditiæ ! labor paternæ tēmeritatis pœna est, quam si quis tum aliorum opibus, tum suis, invitissimo Deo, evolare studet : at aliam multò majorem gravioremque subeat necesse est. Quæ enim homini gravior pœna accidere potest, quàm perpetuâ inveterudine flaccescere. Labor itaque est generale jussum perindè ac præsidium. Jussum quo parentis pœnæ à filiis repetuntur. Præsidium quo sanitas conservari, & à quovis morbo tum imminente, tum gliscente præservari potest. Et verò corporis humani machina malè feriata cessatione torperet, spirituum influxus tardaretur, languerent solidorum oscillationes, malè subactus, aut impulsus sanguis lentè fluere in vasis, spissesceret, hæreret ; nisi per laborem & corporis agitationem, humores, pressione ad motum, spiritus, velocitate ad cursum, solida, viribus ad luctandum, intenderentur. Laboris loco, exercitationem substituere ac supponere juvat. Nec minus motuum agitationumve corporis ludicra exercitatio, quàm quæstuosus ac mercenarius labor sæpius impendit ; imò plus moderationis & temperationis adhibetur in seriis laboribus, quàm in jocularibus hujusmodi exercitationibus, à quibus otiosi homines recedunt, satietate minus affecti, quàm defessi. Quis etenim labor ipsâ venatione & sphæromachiâ molestior ? quis operosior, nostrisque moribus indecentior, nocturnis horum-ce temporum choreis, & ad auroram productâ saltatione, in quâ teneræ virgines, juvenesque fervidi, simulantes chorum, alternis brachiis, manibusque implicatis, pedibus plaudentes, tumultuosè gyraunt, omnes bacchantur, quales Phrygiæ aut Thyiades, ubi audito urgebant trieterica Baccho Orgia ; lacera volitant circumtexta saltantium velamenta, conscant invicem, ac indecoro aut ridiculo casu sæpe concidunt. Quis inquam labor equitandi digladiandiue disciplinis asperior ? Quis veterum cursu, luctatione, jaculatione agrestior decerni potest ? Quæ omnia exercitationum genera inventa sunt, ut non secus ac labor corpus moveant imprimis, agitent, succutiant. Utque pro laboribus data essent homini cessanti, inertī & vacuo. Adeo labor perinde salubris ac necessarius visus est.

III.

CORPORIS humani machina veluti malè materiata resolvitur in dies, perit. Seu secessus fiat, secretio ac direptio earum partium quæ antea junctione aliquâ tenebantur ; seu, quod sæpius fit, nimia suâ labore copiam. Neque plus adjectione deficientium, quàm redundantium detractione conservatur. Ut legerem nimia sternit ubertas, rami onere franguntur, & ad maturitatem non pervenit nimia fœcunditas ; sic victu quotidiano adulatorum hominum corpora obruerentur ; ni quantum ipsis per alimenta accedit materiei, tantumdem ab iis ultrò recederet. Corpus humanum pistrinum aquarum satis opportune dictum est, cujus organa non tam succo farciri, quàm quidquid ipsis creditum ac pensendum venit, totum id reddere allaborant. Usura hujus vitæ fumus ac vapor est ; determinatio liquidorum, non effusio ; extenuatio, non cumulus ; transitus, non accubatio ; inclinatio, non status ; fuga, non conventus ; exspiratio denique, non congestio. Quamdiu viget solidum, quamdiu occillat, quamdiu peregrinos & hospites attrahat liquores, tamdiu vivitur. Alimenta ore assumpta non per diu morantur in corpore, non tergiversantur huc & illuc ; sed ubique à solidis trusa, tritaque, pressa undique, & undique pulsa, in partes dividuntur, quæ

plus minùs tenues citiùs, tardiùs, seriùs, velociùs omnes brevi è corpore expelluntur. Hoc sanitatis argumentum, hæc vera concoctionis gloria existimata est, habere quod statim possit perire. Magnus ille ac mirabilis vasorum apparatus, aptissima figura, partitio non temerè facta, nervosa vis elastica, consona pulsatio & æquabilis, eo spectant, ut circumagantur liquida, secernantur, excernantur. Omnium evacuationum uberrima transpiratio. Omnia enim confluxilia, & perpauca sunt evacuationes quæ per manifestas vias fiunt, præ iis, quæ per occultas. Augurare plurimas vel potius innumerabiles vias, seu potius dehiscencia totidem spiramenta, quæ vaporare possit corpus, exugi, vacuari, exonerari. Publica hæc est evacuatio, universalis, continua, naturæ propria. Quidquid aliorum erumpit aversum est, defleçit à via, minùs naturæ manu mittitur, quàm dimittitur. Transpiratio, ut quævis alia secretio, è sanguinis gremio fit; neque currentis, neque volventis, aut depurgantis se sanguinis, sed solidorum liquida impellentis potentia vi perficitur. Nutritionis perinde ac transpirationis materies chylus est, qui sanguini semel admixtus, confusus vehitur, cæcis tantum cutis spiraminibus eliminandus. Succus est nutritius quamdiu turgidulus fuit in vasis, quamdiu circuitionis jugo additus est, quamdiu materiem comminui expedit; absolutus verò tritura operâ, & in tenuissimum pollinem deductus chylus, in arctissima, quæ tum penetrare potest, vasa excretoria compellitur; tenues evanescit in auras, si ad corporis peripheriam fertur; si verò ad partium interstitia & cava, subita diffussionis defeçtu, tenuissimæ congeruntur particulae, fumus fit vaporosus, quo fibrarum mollietis, flexilitas, facilisque occillatio recreetur. An hæc partium irrigatio, in adultis saltem & sanis corporibus nutritio dici potest? an eadem est nutritionis & transpirationis ratio? ipsissima utique lympa est, quæ nutriendo roat, quæ transpirando vaporat. Imò alimento non amplius opus est, ubi nullum fit ejus dispendium. Quæ cum ita sint, tenes omnium æconomia animalis functionum scopum esse transpirationem. Pax alta, summaque fluidorum cum solidis concordia, facili & expedita transpiratione continetur. Species verò & forma equilibri mutatur, omnium occupatio adest, inclinatio, impotentia, tumultus, ubi occulta hæc evacuatio desideratur.

IV.

CORPUS movere nolis, vel invitum natura compellet, otii impatiens, vaporationis indiga. Otiosos homines vide, ut mirè pandiculantes oscitantur: Mirum sanè per molles hujusmodi oscitationes retenti expirabilis quantum extrudatur. Sese galli ante cantum alis percutiunt, ut meliùs perspirent, vixque aviculæ unum rostro granum conterunt, quin sese multiplici saltu exerçant. Sic est quodcumque vivit, ut transpirare, ita movere se necessum est. Eò uberior est transpiratio quo sub sensum cadit minùs, melius ipsi cedit, cui occulta est, quàm cui manifesta. Multum inter se distant sudor & transpiratio. Cave ne res tam dissimiles eodem nomine appellaveris. Quidam tum veteris, tum novæ scholæ Autores, varia meatuum tubulorumque genera detexisse se arbitrari sunt, quibus unis transpirationem, sudorem aliis secerni oporteat, etsi multi refragantur; omnes tamen conveniunt, totius animalis æconomia conspiratione & concertu

fieri transpirationem; sudorem vi ac renitente naturâ penitus exprimi, lætæque sanitatis aut signum esse, aut causam. Ne igitur existimes sudore augeri transpirationem. Secus verò sudorem puta transpirationis decessum quemdam & cruditatem, tritus defectum & imminutionem. Quæ inter sudandum evacuatur materia, perdita utrinque est, magno nempe solidis & fluidis intertrimento: In hoc ab invisibili transpirationis materie maximè dissimilis, quod fumus hic vaporosus, purus, putusve sit chylus, exactè pistus, comminutus, extenuatus, omni trituræ operâ, eò ut vaporare possit, à naturâ excultus. Sudor vero liquor est, è naturæ sinu vi extractus, minimè subactus, crudus omninò, multo sero dilutus, aliisve succis, ad cutis meatus ferri, neque idoneis, neque destinatis, immistis. Aliena igitur est evacuatio, adventitia, perversa, intempestiva, eorum nempe liquidorum, quæ ad cutaneam excretionem non pertinent. Excitatus itaque sudor est iniquo mancipi & conductori non absumilis, qui vectigalia suo questu pervertit, neque solum debitum non solvit, sartum tectum nihil habet, sed miscet & turbat omnia, destruit, evertit, incendit. Non solum quippe sudores nutritum partibus, visceribus rorem irriguum subducunt, corpora siccant, vires reddunt imbecilles, solvunt spiritus, turbant humores, sed & præcordiis quæ prima sudoris scaturigo est, inustam relinquunt labem. Emaciantur equi sub unius diei sudore, perinde ac homines cardiaci sunt, sub eodem incommodo laborantes. Ut igitur facilis & expedita transpiratio corpori sano firmamenti & roboris fructus affert uberimos; ita sudore perfusum corpus languet, dolores artuum, rigiditates, lassitudines consequitur. Hinc fletus, hinc lachrymæ, hinc sudorum affecla morborum cacohetes. Objicis: qui fiat, ut sanis corporibus sudores elici in perniciem queant; cum diaphoreses hujusmodi copiosæ & humidæ sint februm & inflammationum curatrices; diaphoretica morborum panacea, & ultimum in desperatis ægris perfugium; denique crismus optima sit sudor. Hæc populus garrir scilicet; hæ medicastorum cantilenæ, promissiones auxilii, consolationes doloris. Dictis habetur fides; adeò quisque, in omni re aliâ dubitans plerumque, & sibi ipsi dissidens, falli se in uno salutis negotio, facile patitur. Dubii sunt semper inter spem & metum sudores, naturæ operationem subterfugiunt, signa coctionis in morbis esse non possunt, nihilque ex sudoribus judicari potest. Ex historiis Pithyonis & Erasini patet in febribus sudores esse perniciosos. In genere, in febre acutâ, qui sæpe & multum sudore dissolunt, miserandi. Qui extorquendis sudoribus navare operam & studium volunt, sanguinem incendere hos liquet, & quem servare volunt ægrum, letho dare posse. Itaque plerumque sudores sunt symptomatice, non moventis naturæ, non excernentis ad crism, sed exprimentis morbi, urentis ignis, & spasmodicæ solidorum diathesis effectum. Interdum tamen sudationes, cum ægri levamine, & morbi fugâ, erumpere non dissitemur. Sic diarrhæa, dysenteria, vomitus, diabere, pyralismo & hæmorrhagiâ gravissimos aliquando morbos solutos esse vidimus. At omnes hujusmodi evacuationes, etsi quandoque criticæ, & utiles esse possint; semper tamen ab inordinata fibrarum occillatione, ac deviantibus liquorum directionibus proficiuntur. Namque in hisce cribus, natura sui juris non omninò est, non compositè, & distinctè succos pro-

pellit; sed tumultuosè, raptim, & turbulentè ad incernicula sæpe non sua disturbat; humores determinat, non dirigit; compescendis morbi motibus, quàm suis componendis attentior. Felicissimos dicas Medicos, qui copiosissimis hisce evacuationibus meritò dissidentes, ad sedandum erectissimum, ac restituendam imprimis transpirationem quàm maximè intenti, non magnà remediorum suppellectili abutuntur, neque toti sunt in curarum sordibus

V.

SUDORES profundere quisque non debet, nisi ad summum vexatus morbo. Sudare homini benè sano, inutilis impensa & jactura est. Luxuriosi sunt, & suæ valetudinis dissoluti, quibus ad votum dies actus, si benè desudaverunt; si in locum ejus quod effluxit, multum potionis & cibi, jejuno gutture, ingesserunt. Non ut sudore corpus diffuset, jussus est labor, nisi quibus incommodo valetudinis laborandum est. Parabile est quod natura desiderat, ad superflua sudatur. Sudatus labor, aut intempestivus est, aut nimius. Corporis motus non succorum expirationem facere debet, sed suadere. Mollis quidem placida & æquabilis est, quæ liquidorum motum regit potentia; sed monentem se, non vexantem auscultat; ministrari sibi annuit, regi se non patitur. Duci vult quò vergit natura, sensim & pedetentim progrediens, ad corporis peripheriam succos ultrò excernit minimè conspicuos. Accelerare gradum si jubes, abnuat sæpe, ardet iracundiâ, spasimum concipit, occillat perperam, motusque promit & nifus inconditos, confusè & permixtè humores dispergit, quos discretè & electè digereret, crudumve exprimens succum, quem sudorem vocant, invita, & dolens madore cutim deturpat, quam subtili, suavissimâque aurâ abstergeret. Variâ nempe corporis agitatione & motibus assiduus sudor accersitur, naturâ verò sibi relicta & otiosè operante, transpiratio venit: unde ad sudandum natura compelli potest, ad transpirandum vix potest. Et verò minùs inter agendum, quàm finitâ operâ, expiratur. In exercitio videlicet & motu, succi laxigantur: & in minutissimas partes dividuntur; sed ut postea meliùs vapore possint, in somno, & quiete. Liquida etenim attractatu & quassu, permixta & confusa, vix possunt, nisi pedetentim & sedato nifu, in ordinem, seriemque adduci, secerni, expediri: Unde, quò minor est corporis agitatio, eò uberior est transpiratio insensilis. Quippe cum moderato labore & exercitio firmum stet, constansque machinæ animalis æquilibrium, vigeat nativus occillationum ordo, placiditas, consonantia, æquabilitas, sanguis genuinum servet ritum in vasis. In motu verò violento longè secùs contingit, ultrò citròque versatur æquilibrium, subsultim & inordinatè occillationes vibrant, spasmus fit universus, stringens succos & exprimens, atque in locum vaporis insensilis, humidi tamen, qui membranis molliem & flexilitatem conciliet, cruda confluent, obtenduntur, tensionem solidis & duritatem inferunt. Unde secretio quævis interturbatur, & transpiratio ad horas & fortasse dies aliquot languescit; imò interdum penitus aboletur, & cutis tota instar anserinæ pellis contrahitur. Itaque exercitium sic eligendum est, aut moderandum, ut lassitudinem, caveas & sudorem. Non sit continuus labor, non catenatus, sed idoneo quietis & otii mo-

mento temperatus, intermissus. Ut non est quies, quæ motum omnem molestiam judicat, sed dissolutio & languor: ita labor non est, qui ab omni otio & cessatione abhorret, sed furor, supplicium, & jejuna aviditas. Labore uti juvat, sed sicut somno & quietibus cæteris. Quin etiam, si quis vel minus vel plus quàm consuevit, interdum exerceatur, protinus molestiâ evidenter afficitur. Non improvise & rapido motu, sed leni & modicato à pravâ consuetudine discedendum est. Qui otio torpescunt, laboribus paulatim & exercitationibus assuefiant; ita ut solidatum partium potentiâ sensim releventur, & cæspitantia sæpe liquida, leni quidem, sed continuo motu propellantur; solida obtineant vires magnas, moderatas tamen; liquidorum perennis sit unda, non torrens. Rarioris texturæ corporibus, tenui cibo, potuque spirituofo utentibus, exercitationes sint faciles & breves: ut enim cæteris melius transpirant, sic magis ipsis est ad sudandum proclivitas, & promptissima, si sudore diffuant virium resolutio. Robustissimi homines quique viscoso & crasso cibo utuntur, labores & exercitia corporis tutò sustinent. Ne tamen violentos adeò dent corpore motus, aut sudores; aliàs in diuturnas & immedicabiles corporis ærumnas citò citius incurrerent, quibus omnes Athletas spe brevius affici vidisse se testatur Galenus. Tandem nobis liceat de pernicie sudoris vulgò indemnati, æquum tamen ferre judicium. Sudor ex se res mala est, & mali ominis, quæ non aliâ ratione bona esse contingit, nisi quòd nonnunquam à majori malo divertat.

Ergo non salubris à labore sudor.

Proponebat Parisiis JOANNES-FRANC. LEAULTE,
Baccalaureus Medicus Parisinus. A. R. S. H. 1718.
à sexta ad meridiem.